

MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micorì illa rafue
(Mt 3.1-12; Lc 3.1-9, 15-17; Jn 1.19-28)*

¹⁻² Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micorì Jusiñamui facaina jaie llumona, Juan Bautista micorì llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micorì cuete:

“Ero, o uicodo cue rafuena llollena, damiena ore-taiticue” Jusiñamui raite.

³ Jofue iñenanomo damie jidai-jidaillana cacadicue. Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

⁴ Isaías micorì llua isoi, Juan Bautista raillamie micorìdi Jusiñamui rafuena jofue iñenanomo llofuecana jaide. Cominina dafaifia, naimacimo llote:

—Omoi jeacinona fainonocaida, Jusiñamui dibesimo omoi comeciai iuailai meido. Iemona omoi jeacinona feitaite. Omoi comeciai iuailai omoi meidoia, cominina iena uiñotallena, mai omoi bautizallomoi.

⁵ Diga comini naimie micorì dine jai jaisoidimaci. Jerusalémona, nana Judeamona, nana Jordán fue-mona jai jaisoidimaci. Jusiñamuimo naimaci

jeacinona naimaci llua meino, naimacidi Juan micori bautizaga.

⁶ Juan micoridi camello itiraiiai ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite.

⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue.

⁸ Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

Jesús bautizaja rafue

(Mt 3.13-17; Lc 3.21-22)

⁹ Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúsdi Juan bautizaga.

¹⁰ Bautizaja mei, jinui mona billanona, ieconi mona bojodena cide. Jusiñamui Joreño, ucugi isoi, naimie emodomo ana billana cide.

¹¹ Monamona Jusiñamui llote:

—Cue isiruiga Jitodio. Ori iobidicue.

Jesúna Taife ramo faia rafue

(Mt 4.1-11; Lc 4.1-13)

¹² Jesús bautizaja mei, Jusiñamui Joreño jofue iñenanomo naimiena uite.

¹³ Comini nainomo iñede. Difai ocainaiiai itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

Galileamo Jesús illa rafue

(Mt 4.12-17; Lc 4.14-15)

14 Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide.

15 Llote:

—Jusiñamui birui omoina sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fainonocaida, omoi comeciai iuaina meido. Bie rafuena mai omoi ñino.

Ie llofueoicaigano jaillena, Jesúsdi nagaam-agamiëna fetua rafue

(Mt 4.18-22; Lc 5.1-11)

16 Jiairuido Galilea railla jorai fuemo Jesús macaritemo, menamiëna ciode. Naga ie ama iaïmaiaï. Damie Simón. Jiaïmie Andrés. Lloijina fairaima iaïmaiaï. Iese jaca naie iaïmaiaïdi maijuidiaïmaiaï.

17 Iaïmaiaïmo llote:

—Cue diga omico jaoicaillena, cue diga mai bi. Cue llofueganona omico jaillena jitaïdicue. Lliciaïna birui ocabitomico; iadedi cominina oitomico, cue dibeimo naimaci illena.

18 Iena cacajanona, ieconi iaïmaiaï lloijina fainonocaida, naimie diga jaidiaïmaiaï. Ie llofueganona jaillena, jaidiaïmaiaï.

19 Lliaï bai Jesús jaidemo, jiaïe menamiëna ciode. Naga ie ama iaïmaiaï. Damie Jacobo. Jiaïmie Juan. Iaïmaiaï moodi Zebedeo. Botemo iaïmaiaï lloijina sigaidiaïmaiaï.

20 Jesús iaïmaiaïna uaidote, ie llofueganona jaillena. Ie maijiraini diga iaïmaiaï moonna fainonocaida, botemona ari billanona, Jesús diga jaidiaïmaiaï.

*Jesúdi Janaba anamo itimie jillotaja rafue
(Lc 4.31-37)*

²¹ Bai jaillanona, Capernaumo ie llofuegano dîga Jesús ride. Nainomo naimie ia, sábadoruimo judíuai ofiracomo jaide. Nainomo llofujete.

²² Moisés micorî llogacino llofuerainî isoi llofueñede. Illaîma uai isoi naimie llofuiâ jira, nainomo ite comîni naimie llofuiamona rajîjicâidîmacî.

²³ Janaba anamo illamie nainomo ite.

²⁴ Jesús llofuiâna cacaita, Janabadi îimana ado cuirioitate:

—Odi Nazaret ie Jesús. ¿Bue ñeacadio cai dîga? Caina duere finuaibidîo. Ona uîñotîcûe. Odi Jusîñamui ie mare fetocamiedîo.

²⁵ Jesús naimîena lletade:

—Lîicai. Naimîemona oni jai.

²⁶ Janaba naimîena docaitajanona, ado cuirioil-lanona, naimîemona oni jaide.

²⁷ Iena cîuanona, nana nainomo itîno rajîjicâidîmacî. Conînîri siadotîmacî:

—¿Ñiese ite? Bimie jîaie uaido llofujete. Janabamo naimie llua mei, îimamona Janaba oni jaide. Janaba Jesús uaina înote.

²⁸ Iemona nana Galilea enîruemo Jesús mamecî are soride.

*Jesús Pedro jîfaiñona jillotaja rafue
(Mt 8.14-15; Lc 4.38-39)*

²⁹ Ofiracomona Jesús jaillanona, ie llofuegano dîga, Simón jofomo jaide. Andrés nainomo jîaî jîaînaîaîde. Jacobo, Juan dîga jîaî fo jaide.

³⁰ Ie facaise Simón jîfaiño duide. Abî cuaride. Nainomo itîno Jesúmo naiñaiño duillana llote.

³¹ Iena cacajanona, naiñaiño dine jaillanona, Jesús naiñaiño onollina llinote. Naiñaiñona naidacaitade. Ieconí abí cuarilla faínonocaide. Guille finuanona, ie jofomo itinona ecade.

Jesúdi ailluena duidinona jillotaja rafue

(Mt 8.16-17; Lc 4.40-41)

³² Navuida, jiti bicaidemo, Jesús dine comini ailluena duidinona atidimaci. Janaba anamo itinona jiai atidimaci.

³³ Nana Capernaum comini naie jofonasemo ofidimaci.

³⁴ Jesúdi diga duiconona ailluena duidinona jillotate. Ailluena comini Janaba anamona jillotate. Naimiena jananiai uiñua jira, Jesús naimaci ñaiana rairuide.

Galileamo Jesús llofuia rafue

(Lc 4.42-44)

³⁵ Ie areruido nia monaiñenia, Jesús casillanona, Capernaumona comini iñenanomo Jesús jaide. Nainomo Jusiñamuimo jide.

³⁶ Monaia, casidemo, jofomo Jesús iñena jira, Simón, ie nabaiñiai diga, Jesúsna jenuaide.

³⁷ Baillanona, raite:

—Nana comini ona jenodimaci.

³⁸ Jesús uai ote:

—Jiaie nairaii dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

Jesúdi efonaitimiena jillotaja rafue

(Mt 8.1-4; Lc 5.12-16)

40 Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaia dedi, cuena jillotaredio.

41 Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo.

42 —Ieconi naimie jillode.

43 Ie facaise Jesús naimiena oretaiacanano, naimiemo riire llote:

44 —O jilluana bumo lloñeno; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo feca.

45 Iese Jesús naimiemo llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

2

Jesús tísitaitimiena jillotaja rafue (Mt 9.1-8; Lc 5.17-26)

1 Nigarui illanona, Capernaumo Jesús dane abido ride. Comini iena fidianona,

2 ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofuate.

3 Cominina Jesús llofuetemo, naimie dine nagaamagamie ie bíramo bide tísitaitimiena atidimaci.

4 Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econuano, Jesús ecimo naimiena ie biramo biide diga, rao diga, ana ñuitadimaci.

5 Iena Jesús cüanona, tisitaitimie jilluana naimaci ñnuana Jesús uiñote. Tisitaitimiemo llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

6 Nainomo itinomona damierie Moisés micori llogacinona llofueraini nainomo raidimaci. Comecina facadimaci:

7 “¿Ñiese bimiedi iese llote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

8 Naimaci comeciai facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi?

9 Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona, o bira ferinocaida, mai macari” cue lloia, cue uai siñonana uiñoitomoi.

10 Monamona jaie cue billanona, iimana jaidicue. Ie jira jeacino oni dotaja uai cuemo ite. Iena omoi uiñollena, tisitaitimiemo lloiticue:

11 “Mai naidacai. O bira ferianona, o jofomo mai jai”.

12 Iese naimie raillamona, tisitaitimie jillode. Naidacaida, ie bira feria mei, naimacimona jino jaide. Nana nainomo itino rajjicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicai.

*Jesúdi Levína fetua rafue
(Mt 9.9-13; Lc 5.27-32)*

¹³ Jiairuido jorai fuemo Jesús dane jaide. Ailluena comini naimie dine ofillanona, naimacina llofuefe.

¹⁴ Llofuia mei, Jesús bai macaritemo, Leví raillamiena ciode. Levídi Alfeo jito. Gobierno ucube ouillanomo naimie maijiuide. Nainomo raidena Levína ciode. Naimiemo llote:

—Cue llofuegamiena o jaillena, cue diga bi. — Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci.

¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna cianona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci.

¹⁷ Iena cacajano, Jesús llote:

—Ecairedinodi médicono jitañedimaci; ia duidinodi médicono jitaidimaci. Ie isoide. Mareuidino cuena jitañedimaci; ia maraiñedino cuena jitaidimaci. Jusiñamui dibeimo mareuidinona uaibiñedicue; iadedi maraiñedino uaibiticue. Omoimona

maraiñedino diga nabairiticue; ia naimacina uaibiticue.

*Jesúmo comini guiñenana jicanua rafue
(Mt 9.14-17; Lc 5.33-39)*

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací llua isoi, Jusiñamuina naimací raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimací jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca guitimaci. ¿Bue ñellena cai einamací rafuedo jaiñedimaci?

¹⁹⁻²⁰ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimací diga iñenia, naimací comeci sunaillamona, naimací jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

²² Jacagomona finoca bolsa como finoca vino joneñega. Jonegadena, mairiñena jira, sirillamona igoí raire cuararite. Vino faifite. Igoí jiai faifite. Como finoca vino comogomo jonelle. Iemei iena

faiñeite. Ie isoide. Omoï einamacï rafue ifomo jiaie rafue birui ite. Iena omoïmo llocabitue. Iedo jaidicai –llote.

*Sábadoruimo Jesús llofueoicaigano maijia rafue
(Mt 12.1-8; Lc 6.1-5)*

²³ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijano, guicana jaidimaci.

²⁴ Dajerie fariseuai iena ciuano, llotimaci:

–Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijamona, caimona jai maijidimaci. Iese cai abimo jeacinona jai finodimaci.

²⁵ Ie llofueoicaiganona riiduanu, Jesús uai ote:

–Cuemona jeacino finoñedimaci. David micori jaie finoca rafuemo omoï comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide.

²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconu uanona, guitimaci. Jamai bue isoidino naie llomeniconu guillanu Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede.

²⁷ Jusiñamui sábadona finuamona, sábado ite, nairui illamona comini caimare illenu; ia omoï llofuiamona, iese iñedimaci. Nairuimo rairuica rana finoñellenu, comini iese illenu llofuecabitomoi.

²⁸ Monamona cue billamona, imana jaidicue. Ie jira sábadoruimo comini finolle rafuena

rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

3

*Jesúdi onollina idisarodimiena jillotaja rafue
(Mt 12.9-14; Lc 6.6-11)*

¹ Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite.

² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode.

³ Onollina idisarodimiemo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuena birui omoi meineiadedi, birui marañede rafue finodomoí. Sábadoruimo, ¿nie isoide rafue finuana rairuidomoí?

Comini dinena uai oñedimaci.

⁵ Naimie uaina naimaci ñnoñena jira, ricai llanona, Jesús naimacimo erodate. Duidimiemo llote:

—O onolli mai oni ñuita.

Iena oni ñuitajamona jillode.

⁶ Iena cüanona, fariseuai jino jaidimaci. Naimiena meinellena, illaíma Herodes díbeimo itinona baillanona, naimaci diga coninri siadotimaci.

Jorai fuemo Jesúdi ailluena cominina llofuia rafue

⁷ Naie nairaimona jorai fuemo Jesús, ie llofueoicaigano diga, oni jaide. Galilea railla eniruemona ailluena comini naimie dine bitimaci. Judeamonana jiaino bitimaci.

⁸ Jerusalémona, Idumeamonana, Jordán ruicafabellemona, Tiro jinofemo ite eniruemonana, Sidón jinofemo ite eniruemonana ailluena bitimaci. Nana naimie siño finoca rafuena cacajanona, naimiena cioacadimaci.

⁹ Comini naimiena meetasi raillanona, ie llofueoicaiganomo daje botemo naimie jaillena eenogana llote.

¹⁰ Ailluena duidinona naimie jai jillotaja jira, nana duidino naimiemo riacadimaci. Jilloillena naimiena jetaacadimaci. Iemonana naimie illa bote eenuana jitaide.

¹¹ Jananiai anamo itino Jesúna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui Jitodio.

¹² —Ia Jesús naimiena naimaci lluana rairuide.

*Jesúdi ie doce llofueoicaiganona fetua rafue
(Mt 10.1-4; Lc 6.12-16)*

¹³ Naie facaise anedumo Jesús jaide. Ie jitaillano diese naimie dine uaidote. Naimie dine billa mei,

¹⁴ doce digamienna fetode. Naimie diga jaicabillena, naimacina fetode. Ie rafuena lloillena, naimacina oretaiacade.

¹⁵ Janaba anamo itinomona Janabana oni oretallena, ie uai naimacimo ite.

16 Iese mameci redimaci: Simón; naimie mameci jiaicidi Jesús jítaca Pedrona.

17 Jacobo, Juan; iaímaiai Zebedeo jito iaímaiai. Jiaie mameci iaímaiaina Jesús jonete Boanergesna. Naie mameci oni dobaiñuamona mona guruama. Iciriruilla jira, iese mameci rediiaímaiai.

18 Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide.

19 Judas Iscariote micori; naimiedi Jesúna gaitatatie.

*Fariseuai Jesúna jeare ñaia rafue
(Mt 12.22-32; Lc 11.14-23; 12.10)*

20 Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide.

21 Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaibiacadimaci.

22 Jerusalémona Moisés micori llogacinona llofueraini naie facaise billanona, raitimaci:

—Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúsdi Janabana oni oretate — raitimaci.

23 Naimaci raillana naimie cacajanona, naimie dine Jesús naimacina uaidote. Llote:

—Janaba díbeimo Beelzebú illamona, dama ie abina oretanide.

24 Ero, daje isoi comeciaina lloifienamo daje nairai facañenia, danomo maijinidimaci. Oni jaidimaci.

25 Daje isoi comeciaina lloifienamo daje jofomo itino facañenia, danomo jainaiainidimaci. Oni jaidimaci.

26 Ie isoide. Beelzebú uaido jananiaina omoi llua isoi cue oretai, Janaba ie dibeimo itino diga jai nabairiñede. Iemona naimie comini danomo iñeitimaci. Ie uai ieconi saite.

27 Ero, mairidimie ie jofomo ite rana nibai fiacadomoi. Iena fillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue.

28 Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede;

29 iadedi naimiedi ie Joreñaona jeare ñaiacinona jaca dotañeite. Jusiñamui iena jaca feitañeite — llote.

30 —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

Jesús ie comini

(Mt 12.46-50; Lc 8.19-21)

31 Jesús comini naimie dine rillanona, naimie diga ñaiacanano jino naidaidimaci.

³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

³³ Jesús dinena uai ote:

—¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

—Jadi, cue ei, cue amatiai.

³⁵ Jusiñamui jitaillacinona finodimie cue amana, cue miriñona, cue eina. Imaci ua cue cominina.

4

Jesúdi trigona judaidimiena llua rafue

(Mt 13.1-9; Lc 8.4-8)

¹ Jiairuido jorai fuemo dane jaillanona, ailluena comini naimie dine ofillamona, Jesús naimacina llofuate. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci.

² Ailluena rafuena naimacina llofuate. Raite:

³ —Omoi fueollena, bie rafuemo raise cacarei. Damie trigona judaiaide.

⁴ Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede.

⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

⁶ raise jainañena jira, ecasillamona duide. Ie jira llisiñede.

⁷ Eecuai illanomo jiaie iduai juide. Eecuai sicuamona riarra eecuai ibaica. Ie jira llisiñede.

⁸ Mare eniruemo jiaie iduai juide. Sicode. Llisillamona danademo treinta diga llisillana ote.

Jiainamona sesenta diga llisillana ote. Jiainamona cien diga llisillana ote.

⁹ Omoï jeforena jira, raise fueollena, cue lluamo cacarei. Iena ñno.

*Jesús ie como lloga rafuena llofui rafue
(Mt 13.10-23; Lc 8.9-15)*

¹⁰ Ailluena cominimona jailla mei, naimie diga jaisoidinodi, ie doce llofueoicaigano diga, Jesúmo ie llofuiana jicanotimaci.

¹¹ Uai ote:

—Jusiñamuidi omoïna ie sedaacana rafuena jai uiñotade. Jaie iena uiñoñedomoi. Jiäie cominina iena nia uiñotañede.

¹² Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci. Jusiñamui dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite.

¹³ Cue como llofuiacinona omoï raise cacaiñenia, dane cue llofuiä, iena jiai raise nibai cacaiñeitomoi;

¹⁴ ia iena omoïna llofueiticue. Trigona judaidimiedi Jusiñamui rafue lloraïma isoide.

¹⁵ Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciäimo cacaja uaina ñnotañede.

¹⁶ Jiäie iduai noñemo juide. Dajerie comini comeciai naie noñie isoidimaci. Jusiñamui uai nano naimaci cacaiä, iena caïmare feiñotimaci.

17 Nofiemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci.

18 Jiaie iduai eecuai illanomo juide. Naie iduai sicua mei, iena eecuai ibaila jira, raise lisiñede. Dajerie comini comeciai naie illano isoidimaci. Jusiñamui uaina cacadimaci. Inotimaci;

19 iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitailla rafuena finocana jaiñedimaci.

20 Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Jesúdi lamparína ñaia rafue
(Lc 8.16-18)

21 Jorai fuedo Jesúdi cominina nia llofute:

—Jai uneca lamparín jiaie illanomona atia mei, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade.

22 Ie isoide. Cue rafue llocana jaia, comini comeciai iticinona uiñotade. Unaicino naimaci cacajamona, damierie inotimaci. Damierie inoñedimaci.

23 Omoi jeforena jira, raise fueollena, cue llamo cacarei. Iena ino.

24 'Cue lluomo raise cacarei. Omoi cacaja diese Jusiñamui omoïna uiñotaite.

25 Iena omoi ñnoia, Jusiñamui omoïna canoite. Omoïna uiñocana jaitaite. Jiaimie iena janore cacajamona, iena ñnoñenia, Jusiñamui naimiena faifitaite.

Jesúdi Jusiñamui ie cominina sedaacana llofua rafue

26 Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoïmo lloiticue. Damie ie illimo judaiaide.

27 Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede;

28 ia eniruemonana nano sicode. Monaila mei, lliside. Iemonana naicuai comuide.

29 Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

Jesúdi mostaza ido llua rafue

(Mt 13.31-35; Lc 13.18-19)

30 Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

31 Jiaie rafuedo iena omoïmo lloiticue. Damie mostaza idona rillamona, naiemona eo aillue riarra sicode. Mostaza ido eo janorede;

³² iadedi sicua mei, eo aillue riará jaillamona, ie onogaillaí jegairiena jira, icairo anamo manaidinomo silliníai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

³³ Naie isoide rafuíaído Jesúsdi Jusiñamui ie cominina sedaacana rafuena cominimo llote.

³⁴ Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofuate.

Jesúdi jorai baguana llucaitaja rafue

(Mt 8.23-27; Lc 8.22-25)

³⁵ Ailluena comini llofuia mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

³⁶ Cominina fañonocaida, botemo naimie jai illamona, naimie llua isoi, oni jaidimaci. Jiaie botes jiaí jaide.

³⁷⁻³⁸ Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinaillamona, Jesúsna casitatimaci. Raitimaci:

—Maestro, ¿niese itio inoilla? Caina cano. Jai buisaidicai. Corobaisaidicai.

³⁹ Naimie casillano, aifina lletade. Jinui baguana llucaitade. Ieconí aifi llucaide. Bagoñede.

⁴⁰ Ie llofueoicaiganomo jicanote:

—¿Bue ñellena jacinaitomoi? ¿Niese cuena raise ñnoñedomoi?

⁴¹ Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina ñnote. Jorai naimie uaina jiai ñnote. —Bai jailanona, ruica ñine ridimaci.

5

Jesúdi Gadara railla eniruemo illa rafue

(Mt 8.28-34; Lc 8.26-39)

¹ Ruica ñine naimaci ridemo, Gadara railla eniruemo sijidimaci.

² Botemona ari Jesús jaidemo, naimie ñine damie bite. Naimiedi Janaba anamo itimie.

³ Comini raiõillanomo nofie moto ifuaïmo naimie i-isoide. Janaba anamo naimie illamona, comini ñiga marena jaca irainide.

⁴ Ñiga icaïño lleo ñiga ie onollidi maïga; iadedi oni ecocaida, lleoona ticonote. Ie eilli jiai maïga; iadedi saitaicaida, lleoona ticonote. Ie jira buna naimiena raise mainide.

⁵ Nagarui nofie motomo ite. Anedumo jaisoide. Cuiricuirisoide. Dama ie abina nofici ñiga jaidode. Iese naimie isoide.

⁶ Nofiemona Jesúna ciuanona, aisicana Jesús ñine bite. Naimiena sedallena, ie caiñici ifodo ana rainadate.

⁷⁻⁸ Jesús llote:

—Janaba, bimiemona oni jai.

Janabadi ñimana ado llotatate:

—Nanoca Jusiñamui Jitodïo. ¿Ñiese cuena nibaiacadïo? Jusiñamui mamecido cuena duere finoño.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

10 Bie illanomona naimacina oretañellena Jesúmo duere jıcanotımacı.

11 Naie facaise nainomo ite anedumo ailluena chanchuai itımacı.

12 Chanchuai abımo naimacı jaillena Jesúmo duere jıcanotımacı.

13 Jesús dinena:

—Jee —raite. İeconı iima abımona oni jaillanona, chanchuai abımo jaidımacı. Dos mil chanchuai nainomo itımacı. İena suidemo, iconı jıllacımo joraimo chanchuai aisıano corobaisıdımacı.

14 İena cıuanona, chanchuai sedarainı naimacı nairai dıne aisıcana jaidımacı. Naie rafuena llocana jaidımacı. İe jira dıga comıni jaide, naie rafuena raise fidıllena.

15 Jesús dıne naimacı ridemo, jaive Janaba anamo illamıena Jesús ecımo raıllana cıodımacı. Naimıe inıroına jai jıtade. Naimıe jai uairicoñede. İena cıuanona, Jesúna jacırıtımacı.

16 Naie rafuena cıodıno jaive Janaba anamo illamıe jılluana llotımacı. Chanchuaimo suide rafuena jıai llotımacı.

17 Naie enıruue itınodı Jesúmo naimacı enıruemonona oni jaillena duere jıcanotımacı.

18 Botemo Jesús jaiacania, jaive Janaba anamo illamıe Jesúmo jıcanote, naimıe dıga jaillena;

19 İa Jesús raite:

—Dama ite. O nabaiñıai dıne jai. Nana Jusiñamui omo fınoça rafuena naimacımo llono. Jusiñamui ona duenaıllana naimacımo llono.

20 İe jira oni jaide. Nana Decápolis raılla enıruemo Jesús nana naimıemo fınoça rafuena

llocana jaide. Iena cacajamona, nana comini rajicaidimaci.

*Jesúdi mena duide riñona jillotaja rafue
(Mt 9.18-26; Lc 8.40-56)*

²¹ Ruica díbeimo ie llofueoicaigano díga Jesús abído rilla mei, ailluena comini naimie díne ofidimaci. Jorai fuedo naimie nia ia,

²² Jairona mameciredimiedi Jesús díne bite. Naimiedi judíuai rafue ofiraco sedaríma. Jesúmo duere jícanollena, ana bitadate.

²³ Duere jícanote:

—Cue jisa jai fiodiaicade. Cue jofomo cue díga bi, o onollí naiñaiño o jonellena, naiñaiño jilloil-lena.

²⁴ Iena cacajano, ie llofueoicaigano díga, naimie díga Jesús jaide. Ailluena comini Jesúmo ñaijillanona jaídímaci.

²⁵ Bai jaillanona, duidiñaiño Jesús jínafona jaide. Naiñaiño jeraimona doce años jaca díaide.

²⁶ Díga manorainimona duere sefuide. Jilloñede; ia fodo jaide. Nana ie ucube jíai fuite.

²⁷ Jesús duidinona jilluana naiñaiño fidíamona, jínafo dínena billanona, naimie iniroina jetade.

²⁸ “Naimie iniroi cue jetajamona jilloitícue” comeцина facajamona, naiñaiño naimie iniroina jetade.

²⁹ Ieconí díaiilladí faínonocaide. Ie abí jilluana naiñaiño jai uíñote.

³⁰ Ie abímona ie uai oní jaillana Jesús uíñuanona, dobaicaide. Cominímo jícanote:

—¿Bu cue iniroina jetade?

³¹ Ie llofueoicaigano dínena uai otímaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

³² Raise uiñollena, Jesús ie ecimo itinomo erodate.

³³ Duidiñaiño ie jilluana uiñua jira, Jesús dine jaciruicana bite. Naimie uicomo ana bitadajanona, nana naiñaiño ite rafuena llote.

³⁴ Naiñaiño ite Jesús llote:

—Ñoo, cuena o ñnua jira, jai jillodio. Mai marena o jai. O duicomona jai jillobidio.

³⁵ Naiñaiño diga Jesús nia ñaitemo, Jairo jofomona jiaino bite. Jairomo llote:

—O jisa jai fiodaite. Maestrona ñaidoño.

³⁶ Iena cacajano, Jairomo Jesús llote:

—O comeci jarire iño; ia cuena nia ñno.

³⁷ Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama.

³⁸ Jairo jofomo rillanona, nainomo itino eecuinaillana cacade. Failliñaillana cacade.

³⁹ Jesús fo jailla mei, nainomo itinomo jicanote:

—¿Niese itomoi eecuinailla? Cuemona naiñaiño fiodañedesa. Jamai inde.

⁴⁰ Iena cacajano, naiñaiño jai fiodaite uiñuamona, Jesús jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide.

⁴¹ Naiñaiño onollina llinocaida, judíuai uaido raite:

—Talita, cumi. —Iena oni dobaiñuamona: “Jitaibici, mai naidacai” raite.

⁴² Ieconi jilluanona naidacaide. Jai jilluano macarite. Naiñaiñoño doce años jai ite. Nana nainomo itino ieri eo raijicaidimaci.

⁴³ —Bumo bie rafuena lloñoño —naimacimo Jesús llote. Guillena naiñaiñoña ecajana jiai llote.

6

Nazaretmo Jesús illa rafue (Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano diga Nazaretmo ride.

² Rilla mei, sábadoruimo nainomo ite ofiracomo llofuate. Iena cacajanona, nainomo itino raijicaidimaci. Raitimaci:

—¿Ñiese eo abina uiñoño? ¿Bumona ie uaina ote? ¿Ñiese siño rafuena naimiedi finode? Naimiedi jamai bue isoidimie.

³ Naimiedi amederaima. María jito. Ie amatiadi Jacobo, José, Judas, Simón. Naimie miriñoñotiaidi cai motomo jiai ite. —“Cai comena naimie ite” raillanona naimie uaina jamaidimaci.

⁴ Jesús naimacimo llote:

—Naga illanomo cominidi Jusiñamui facaina lloraima uaina feiñoñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoñiacasiñede. Jamaisite. Ie isoide. Cue cominidomoina jira, cue uaina ñinoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotote;

⁶ ia naimaci ñinoñenari raijicaide. Ie mei diga nairaimo Jesús llofuecana jaide.

*Jesúdi ie llofueoicaiganona oretaja rafue
(Mt 13.53-58; Lc 4.16-30)*

⁷ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Ie rafuena llollena, jiaie illanuaimo naimacina menamerie oretaiacade.

⁸ Raite:

—Ailluena rana uiñeno. Omoi abi riidollena, jiguidana uiño. Llomeniconona uiñeno. Ailluena rana omoi uiñellena, bolsana uiñeno. Ucubena uiñeno.

⁹ Zapatona jitajano jai. Abi omoi meidolle iniroina uiñeno.

¹⁰ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i.

¹¹ Omoina bu feñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

¹² Jesús naimacimo llua mei, jaidimaci.

—Omoi jeacinona fañonocaillanona, Jusiñamui dibeimo omoi comeciai iuai meiduana omoi jai — llofuecana jaidimaci.

¹³ Janaba anamo ite cominimona Janabana oredimaci. Duidino abimo farena gia mei, naimacina jillotate.

*Juan Bautista micori fiodailla rafue
(Mt 14.1-12; Lc 9.7-9)*

¹⁴ Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micorí jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micorí jai jillode.

¹⁶ Jesúna fidiano, Herodes começina facade: “Juan micorí ie ifogina navui jaitataticue. Fiodaillamona naimie jai jillode”.

¹⁷⁻¹⁸ Iese começina facade, Herodes Juan micorína navui meinetaja jira. Juan Bautista micorína nia meinetañenia, Herodes ie ama Felipe aina ote. Naiñaiño mameçidi Herodías. Ie jira Juan micorí naimiemo lloste:

—O ama ai diga itio. Maraiñede rafuena finodio. Jusiñamui iena rairuide.

¹⁹ Ie muidona Herodías dinena Juan Bautista micorína jearuite. Naimiena meinetaiacade;

²⁰ ia finonide, Juan Bautista micorína Herodes jaciruilla jira. Naimiedi Juan micorína mareuidimiena uiñote. Naimie Juan micorí Jusiñamui rafuedo jaillana jiai uiñote. Ie muidona naimie Juan micorína raise eenote. Diga icaiño naimie micorí lluana cacade. Iena gaide; ia iena raise cacaiñede. Ie muidona Herodías naimie micorína meinetanide;

²¹ ia ja muidomo naiñaiño sedallirui ride. Herodes cumpleaños ie rafuena finode. Ailluena illaicominina ie rafuemo uaidote. Eo ucuberedinona jiai uaidote.

²² Rafuemo Herodías jisa saillamona, Herodena iobitade. Ie uaidoganona jiaí iobitade. Iobillamona, Herodes naiñaiño mo llote:

—O jitailla ra cuemo jica. Iena omo fecaiticue.

²³ Illaí ma uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairaí o jicadidena, atuedo omo iiticue.

²⁴ Iena cacajano, naiñaiño ie ei dñe jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes dñe raire abido billanona, llote:

—Juan Bautista ifogí bandejamo ja jonecaida, cuemo ine.

²⁶ Iena cacajano, Herodes sunaite; iadedí naimie llua jira, nainomo naimie uaidogano jiaí illa jira, ie lloga uaina janoiacaíñede.

²⁷ Ie facaise ie soldaduaímona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade.

²⁸ Bandejamo naimie ifogí jonecaida, iena atiano, Herodías jisamo fecade. Ieconi ie eimo fecade.

²⁹ Iena fidianona, Juan micorí llofueoicaigano naimie micorí abina uaíbitimaci. Iena raitimaci.

Jesús cinco mil iñiaína eaja rafue

(Mt 14.13-21; Lc 9.10-17; Jn 6.1-14)

³⁰ Jesús llofueoicaigano abido bia, Jesúmo nana naimaci finoca rafuena llotimaci.

³¹ Ie facaise ailluena comini naimaci dñe biñoidimaci. Ie jira jafaici ollena abí juanide. Guillena jiaí abí juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli.
Comini iñenanomo mai cai jailli.

³² Ie muidona botedo comini iñenanomo dani jaidimaci.

³³ Ailluena comini naimaci oni jaillana cioidimaci. Naimacina uiñuamona, diga nairaiaimona aisicana jaidimaci. Jesús nia riñenia, uicodo ie jaillanomo ridimaci.

³⁴ Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofujete.

³⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuicade.

³⁶ Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaidio.

³⁸ Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

³⁹ Iena cacajano, cominimo raitie illanomo dajerise ana raillena Jesús llote.

⁴⁰ Naimaci cien digamierie ana raisite. Jiaino cincuenta digamierie ana raisite.

41 Naie cinco llomenicono, naie mena lliciai diga, Jesús uanona, monamo eruaiñlanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade.

42 Nana guillanona monidimaci.

43 Monillamona, fiebide guillena iraidimaci. Doce cirigaiaimo oruitatimaci.

44 Cinco mil iññiai diese guitimaci. Naimaci ainiai, imaci uruiiai diga, jiai guitimaci.

*Jesús jinui emododo macarilla rafue
(Mt 14.22-27; Jn 6.16-21)*

45 Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote.

46 Cominina facadua mei, aneduaimo dane jaide, Jusiñamui diga ñaillena.

47 Jitibicaidemo, nainomo dama ite. Ie llofueoicaigano jorai motomo jai itimaci.

48 Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide;

49 ia naimiena naimaci ciuanona, comecina facadimaci: “¿Bu joreño caimo billana ciodicai?”

50 Naimiena ciuamona, nana jacinailamona cuiroidimaci. Naie dacaiño Jesús naimacimo llote:

—Omoi joreñonicaiño. Cuesa. Jaciruiño.

51 Botemo Jesús jaide. Ie facaise aifi llucade. Ieri eo rajjicaidimaci.

52 Janore guillemona ailluena cominina naimie ecajana jaive ciodimaci; ia naimie uai siñonana

nia raise uiñoñedimaci. Naimiena nia raise ñnoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci.

⁵⁴ Botemona ari jaidemo, nainomo itino Jesúna uiñotimaci.

⁵⁵ Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atiuidimaci.

⁵⁶ Diga nairaiimo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

7

Jesúdi comini comeciaina ñaia rafue

(Mt 15.1-20)

¹ Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiai bitimaci.

² Jesús llofueoicaiganomona damierie naimaci isoi guiñenana cioidimaci.

³⁻⁵ Fariseuai dinena Jesúmo jicanotimaci:

—¿Bue ñellena omoi llofueoicaigano cai einamací rafuedo jaiñedimaci? Naimaci guiacania, naimaci onolli cai einamací llua isoi, raise jocoñedimaci. Ie jira cai abimo jeacino finodomoí.

Iese jıcanotımacı, naimacı einamacı rafuedo naimacı jailla jira. Maraiñede rafue naimacimo suiñellena, iese ailluena judııai jaidımacı. Naimacı guiacania, naimacı einamacı llua isoi, onollına diga ıcaiño jocuano, guitımacı. Mercadomona bia, naimacı einamacı llua isoi, abına lleredımacı. Naimacı einamacı llua isoi, tazones, ollas, bandejas jıai jocodımacı. Iese jaisoidımacı. Comecına facadımacı: “Iese cai finoia, Jusiñamuimona mare. Iese cai finoñenia, Jusiñamuimona maraiñede. Naimıe caina duere finoite”. Jearede rafue naimacı abımo oñellena, iese finouidımacı.

⁶ Jesús uai ote:

—Mareuidınona abı caitauidınodomoı. Isaías mıcorı jaie omoına raise llote. Naimıedi Jusiñamui lluaana cuete:

Bımacı naimacı uaido marecınona cuemo llote;
ıadedı cue rafuedo raise jaiacaiñedımacı.

“Ona isiruitıcai” llotımacı.

“Ona sedadıcai” llotımacı.

Jamai ñaitımacı. Naimacı comecıai cue dıbeımo raise iñede.

⁷ Cue uai itena, jamai comını llucınona naimacı llofuecabilla jira, taınona cuena sedadımacı cuete.

⁸ Isaías mıcorı llua isoi itomoı. Jusiñamui llogacınona faınonocaida, omoı einamacı rafuedo jaidomoı.

⁹ ¿Bue ñellena nana Jusiñamui llogacınodo jaiñedomoı? Omoı einamacı llogacınodo jaidomoı; iadedı nana Jusiñamui llogacınodo raise jaiñedomoı.

¹⁰ Moisés micorí jaie llote: “O moo uai #nuanona, naimiena cano. O ei uai #nuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

¹¹⁻¹² Iese Moisés micorí llote; iadedi omoi einamací llotimací: “Jusiñamuimo caí ucubena caí fecajamona, caí mooná, caí eina jai canonidícaí”.

¹³ Iese omoi finocabilla jira, omoi einamací llogacínodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

¹⁴ Fariseuai díga iese llua mei, naimie ecimo ailluena comíni dane ofillanona, naimacimo llote:

—Iena raise omoi uiñollena, cue lluomo cacarei.

¹⁵ Omoi einamací isoí omoi guiñenia, naimací isoí omoi onollina omoi jocoñenia, omoi comeciaína jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoímo jeacino illa jira, Jusiñamuina nabaiñedomoi. Omoi comeciaí jearena jira, jeacínona finocabidomoi.

¹⁶ Omoi jeforena jira, raise fueollena, cue lluomo cacarei. Iena #no.

¹⁷ Comínimona oni jaillanona, Jesús ie risoilla jofomo jaide. Nainomo ie llofueoícaigano aillínano ie lluaña jicanotimací.

¹⁸ Uai ote:

—¿Ñiese cue lluaña jiaí nia cacaiñedomoi? Ñie isoide ra guitomóina, omoi comeciaímo jeare iñede.

¹⁹ Omoi comeciaímo jaiñede; ia omoi jebemo jaide. Ie mei omoi abiaímona jino bite.

Jesús lluamona, nana guille radí mare uiñotícaí.

²⁰ Jesús llote:

—Omoï comeciaï jearena jira, jearede rafuena finocabidomoi.

²¹ Omoï comeciaï jearena jira, jeare comeciaïna facacabidomoi. Omoï aiñede riño diga icabitomoi. Omoï iniñede ïma diga icabitomoi. Fïricabitomoi. Cominina meinecabitomoi.

²² Jiaï comini rana nicidocabitomoi. Jearede rafuena finocabidomoi. Iena ebiruitomoi. Jifuericabidomoi. Abina uradoicabidomoi. Jiaïe comini joreñona jeare ñaicabitomoi. Abina iedocabitomoi. Ebena jaicabidomoi.

²³ Bie isoidicinuai omoï comeciaïmo illa jira, jearede rafuena finocabidomoi; iadedi omoï einamacï llua isoi, omoï onollï jocoñenamona jeacino comuiñede.

*Jesúdi judío iñaiñoñediñaiñoña jillotaja rafue
(Mt 15.21-28)*

²⁴ Nainomona Jesús jaillanona, Tiro railla eniruemo jaide. Sidón railla eniruemo jiaï jaide. Nainomo jofomo jaillanona, iena buna fidiana jítaiñede; ia iena janonide.

²⁵⁻²⁶ Ie facaise judío iñaiñoñediñaiño daño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidianona, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade.

²⁷ Judíuaiñedinona naimie canoñenana naiñaiño uiñollena, naiñaiño mo Jesús llote:

—Uruiaï guillamona jiconiaïna ecadicaïdena, maraiñede. Uruiaï nano ecadicaï.

²⁸ Naiñaiño dinena uai ote:

—Jii, maestro; iadedi jiconiaidi uruiái guillamona fiebide guillemona guitimaci. —Iese lloite; ia jiaie rafuemo começina facade. Uruiaína lloite; iadedi judíuaimo começina facade. Jiconiaina lloite; ia judíuainedínomo jiai começina facade. Começina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁹ Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa biiramo biidena ciode. Janaba naiñaiñomona oni jaillana jai uiñote.

Jesús jefona cacaiñedimiena jillotaja rafue

³¹ Tiro railla eniruemona Jesús oni jaide. Jailanona, Sidón railla eniruemo jaide. Decápolis railla eniruemo jiai jaide. Ja muidomo Galilea railla jorai fuemo ride.

³² Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci.

³³ Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade.

³⁴ Jusiñamui dine monamo eruaíta, naimiena duenaillamona, jafaicina faite. Judíuai uaido naimiemo lloite:

—¡Efata! —Oni dobaiñuamona: “¡Ecoricai!” raite.

³⁵ Jeconi ie jefodi ecoricaide. Jai raise cacade. Jai raise ñaite.

³⁶ Cominimo:

—Bimie jai jilluana bumo lloñeno —Jesús diga icaíño lloté; ia naimie uaina ñnoñedimaci. Iena llocana uitimaci.

³⁷ Naimieri eo raijcaidimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

8

Jesúdi cuatro mil iñiaina ecaja rafue

(Mt 15.32-39)

¹ Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenaila jira, naimacina canoiacadicue.

⁴ Jicanotimaci:

—¿Niese naimacina bene ecaiticai? Jofue iñenanomo iticai.

⁵ Jesús jicanote:

—¿Niga llomenico omoimo ite?

Uai otimaci:

—Siete.

⁶ Comini ana raillena Jesús lloté. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci.

⁷ Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote.

⁸ Nana guitimaci. Monidimaci. Monillamona, fiebide guillena iraidimaci. Siete cirigaiamo oruitatimaci.

⁹ Nainomo cuatro mil iñiaiai guitimaci. Naimaci ainiaiai, imaci uruiaiai diga, jiai guitimaci.

¹⁰ Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

Fariseuai comini Jesúmo siño rafuena finuana jicanuano billa rafuena

(Mt 16.1-4; Lc 12.54-56)

¹¹ Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uifnotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

¹² Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

¹³ Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

Jesús siritate rana llofuia rafue

(Mt 16.5-12)

¹⁴ Ruica dine rilla mei, Jesús llofueoicaigano llomenicono feillana uibiñotimaci. Naimacimo daje llomenico ite.

15 Iena naimie uiñuamona, naimacimo Jesús llote:

—Fariseuai siritate ramona abina rairui. Illaima Herodes siritate ramona abina rairui. —Iese Jesús llote; iadedi naimaci llofuiacinomona abi rairuil-lena ñaite.

16 Jesús iese llua jira, iena naimaci raise cacaiñena jira, dani coniniri siadotimaci:

—Llomeniconca cai atañena jira, caimo iese llote.

17 Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Ñiese cuena ñinoñedomoi? Cuemo siño uai illana nia raise cacaiñedomoi.

18 Uisiredomoi. Jeforedomoi. ¿Ñiese cue navui siño finoca rafuemo comeciaina facañedomoi?

19 Navui cinco mil iñiaia cinco diga llomeniconca guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

20 Jesús llote:

—Jiaicaiño cuatro mil iñiaia siete diga llomeniconca guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

21 Jesús dinena jicanote:

—¿Ñiese cuena nia raise ñinoñedomoi? Siño uai cuemo illana nia raise ñinoñedomoi.

Jesús uisnidimiena jillotaja rafue

22 Oni macarillanona, Betsaidamo Jesús, ie llofueoicaigano diga, ride. Ie facaise naimie dine

comini uisnidimiena atide. Naimiena jilloitalena, naimiena jetallena, Jesúsno jicánote.

²³ Iena Jesús cacajanona, ie onollina llinuanona, nairai illa jinofemo uisnidimiena uite. Ie mei ie uisina tuade. Ie uisina jiai jetade. Naimiemo jicánote:

—¿Buena ciodio?

²⁴ A eruaiñanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

²⁵ Ie uisina Jesús dane jetade. Iemona oni ero-caillamona, jai jillode. Jai raise ciodio.

²⁶ Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñoeno; ia nainomo jaiñoeno o jofomo mai abido jai.

Pedro Jesúsna llua rafue

(Mt 16.13-20; Lc 9.18-21)

²⁷ Cesarea Filipo eniruemo ite nairaiñimo Jesús jaidemo, ie llofueoicaiganomo jicánote:

—¿Ñiese jiaie comini cuena raitimaci?

²⁸ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁹ Jesús dane jicánote:

—¿Ñiese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci

³⁰ Jesús iena bumo llua rairuide.

*Jesús ie fiodaillena llofuia rafue
(Mt 16.21-28; Lc 9.22-27)*

³¹ Ie facaise ie llofueoicaiganona ie duere sefuillena llofueite. Llote:

—Cai judíuái illaicomíni cuena eo duere finoitímaci. Cuena jitaiñellemona, cuena meineitímaci; iadedi darui amani illanona, fiodaillamona jilloitícue.

³² Iena marefodo naimacimo llote. Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

³³ Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comíni isoi cuemo comecina facadio.

³⁴ Naimie dine ailluena comíni uaidua mei, ie llofueoicaigano nainomo jiai illanona, naimacimo llote:

—Cue comínina bu jaiacania, ie jitaille rafuedo jaiñena. Cue díbeimo naimie jaillamona, duere sefuicana jaite. Níbai naiemona fiodaite. Bu iese jaiacania, cue díbeimo naimie iite.

³⁵⁻³⁷ Duere sefuillana jaciruillamona, cue comínina bu jaiacaiñenia, ja muidomo faífite; iadedi duere sefuillana jaciruiñenamona, cue comínina bu jaiia, jaca faifiñeite. Cue comínina bu jaiñenia, níbai eo duere sefuiñeite. Níbai ailluena ra naimiemo iite; ia, ¿ñiese cue Moo dine riite? Nainomo naimie riñeno faífite.

³⁸ Birui ite comíni Jusiñamuina jitaiñedímaci. Naimiena jai faínonocaidímaci. Jeacina

finocana jaidimaci. Cuen a bu meiruia, cue rafuena bu meiruia, dane cue bia, naimiena meiruiticue. Cuen a meiruillamona: “Cristom duidicue” bu lloiacañenia, ico cue bia: “Naimiedi cue comini” lloñeiticue. Jusiñamui jaienisaí diga, cue Moo dinena, monamona ico biiticue. Cue Moo uai cuemo illanona, ebire biiticue.

9

¹ 'Omoimo uanaicinona lloticue. Omoimona dajerie nia fiocañeitomoi, illaimana ebire cue bairellena cioitomoi.

*Jesús abi meidocaila rafue
(Mt 17.1-13; Lc 9.28-36)*

² Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiaí uite. Juan jiaí uite. Jiaie llofueoicaiganona uñede. Nainomo rilla mei, naimaci uicomo naimie abi meidocaide.

³ Naie dacaiño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede.

⁴ Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiaimaiaí.

⁵ Iaimaiaí jaicana, Pedro Jesúmo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

⁶ Eo jaciruilla jira, naimie ñaia rafuena raise uñoñoeno jamai ebena ñaite.

⁷ Ie facaise uillie billamona, naimacina ibaide. Uilliemona Jusiñamui llote:

—Bimie cue isiruiga Jito. Naimie lluamo cacareillanona, iena ino —llote.

⁸ Ieconí oni erodajanona, dama Jesúsna ciodimaci. Jiainona cioifedimaci.

⁹ Anedumona bitimacimo, naimacimo Jesús llote:

—Omoi ailli cúa rafuena bumo lloñoeno, cue fiodaillamona cue jillua dinori.

¹⁰ Jesús llua isoi finodimaci. Iena bumo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci.

¹¹ Naimiemo llotimaci:

—Moisés micorí llogacinona llofueraíni birui raicabitimaci: “Elías raillamie dane biite. Ie mei cai jilloitaraima biite” raitimaci. Jusiñamui mona o billana inoticaí. Odi cai jilloitaraimana inoticaí. Odi cai jilloitaraimadíomo, ¿bue ñelli iese raitimaci?

¹² Uai ote:

—Raise inotomoi. Elías isoidimie jai bite, nana Jusiñamui jitailla rafue raise lollena. Jusiñamui díbeimo naimaci illena, comíni imaci comeciái meiduana llote. Jusiñamui facaina lloraíni micoriaí cue eo duere sefuillena cuetimaci. Comíni cue jeare finollena cuetimaci. Iemo omoi comeciaina jiai faca.

¹³ Elías isoidimie jai bite; iadedí Jusiñamui facaina lloraíma micorí jaie cuela isoi, naimaci jitailla jira, naimiena jai meinetimaci.

*Jesúdi Janaba anamo itimiena jillotaja rafue
(Mt 17.14-21; Lc 9.37-43)*

¹⁴ Ie jiaie llofueoicaigano dine Jesús abidoria, nainomo ailluena comíni itimacimo ride.

Moisés micorì llogacinona llofuerainì òinena ie llofueoicaigano uaina uaitaside.

15 Jesús billana cominì ciuanona, jacinaisìdimaci. Naimièna feiñollena, naimie òine aisida jaidimaci.

16 Moisés micorì llogacinona llofuerainìmo Jesús jìcanote:

—¿Niese cue llofueoicaigano uaina uaitatomoì?

17 Uai oñedimaci; ia cominìmona damie uai ote:

—Maestro, Janaba anamo cue jito illa jira, o òine naimièna atidìcue. Cue jito Janaba anamo illamona ñainide.

18 Nagarui Janaba bille òiese, naimièna eniruemo uaitate. Iemona fueðì mullede. Ie isidodì murude. Ie abi jaiare jaide. O llofueoicaiganomo jìcadìcue, Janabana oni oretallena; ia oretanidimaci. Ie jira Moisés micorì llogacinona llofuerainì bie rafuena, o llofueoicaigano òiga, uaina uaitatimaci.

19 Iena cacajanona, Jesús ie llofueoicaiganomo llote:

—Cue uai siñonana nia ñnoñedomoì. Omoì òiga are itìcue. Raise omoì ñnollena, ¿nie òinori omoì òiga iitìcue?

Naie duidimie moomo llote:

—O jito cue òine mai atì.

20 Naie urue Jesús òine atianona, Janaba naimièna naillitate. Iemona urue eniruemo uaide. Jabì-jabìde. Fue mullede.

21 Jesús òinena naie urue moomo jìcanote:

—¿Nie òinori o jìtodì bie isoi ite?

Uai ote:

—Naimie uruenamona.

²² Janabadi, diga icaiño iraimo usillena, naimiena uaitate. Corobaillena, diga icaiño jinuimo jiaí uaitate. Janaba oni o oretarenia, cocona duenaillamona, cocona cano.

²³ Jesús uai ote:

—“O oretarenia” raitio. Ero, o jito jillotaredicue. Cuen a o ñnoia, o jito jilloite.

²⁴ Naie urue moo ieconi llote:

—Ona ñnoticue. Raise nia cue ñnoñenia, cuena raise ñnota.

²⁵ Naie facaise ailluena comini naimie dine raire ofillana naimie cianona, Jesús Janabana lletade:

—Bie uruena ñaitatañedio. Naimiena cacaitañedio. Naimiemon a oni jai. Naimie dine dane biñeno.

²⁶ Ado cuirioillanona, naimiena eo riire naillitajanona, Janaba oni jaide. Iemon a naie urue fiodaitimie isoi ero caide. Naimiena cianona, nainomo itino raitimaci:

—Naimie jai fiodaite;

²⁷ —ia Jesús naimie onollina llinocaida, naimiena a naidanete.

²⁸ Iemon a oni jaillanona, damie jofomo Jesús nailli ria, naimiemo ie llofueoicaigano anado jicanotimaci:

—¿Bue ñllena Janabana oni oretanidicai?

²⁹ Jesús uai ote:

—Jusiñamuimo omoi jiamona, naimiena raise omoi ñnuamona, bie isoide Janabana oretare-domoi. Naimiena omoi raise ñnoñena jira, bie uruemon a Janabana oni oretañedomoi.

*Jesús ie fiodaillena dane llofua rafue
(Mt 17.22-23; Lc 9.43-45)*

30-31 Ie llofueoicaigano dĩa Jesús oni jailla nona, Galilea railla eniruemmo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimmo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimmo fecaitimaci. Naie illaicomini cuena meineitimaci; iadedi darui amani illanona, jilloiticue.

32 Ie llofueoicaigano iena raise cacaiñedimaci; ia naimiemmo iena jicanuana meiruitimaci.

*Jesús ie llofueoicaigano moto imiena ille rafue
(Mt 18.1-5; Lc 9.46-48)*

33 Capernaumo Jesús rilla mei, ie risoilla jofommo naimie ia, ie llofueoicaiganommo jicanote:

—Naisona cai bia, ¿nie isoide rafuena coniniri siadotomoi?

34 Uai oñedimaci. Naimaci moto imiena illena, naisodo siadocana bitimaci. Meiruillanona, uai oñedimaci.

35 Naimie ana rainadaja mei, ie ecimmo naimacina uaidote. Raite:

—Omoi moto imiena bu iacania, jamai bue isoidimiena naimie illa. Omoi muillaimana naimie jailla isoilla.

36 Iena naimaci raise uñollena, nainommo ite cominimona daje urue bai jainanocaida, naimaci motommo naimiena jonete. Naimiena menioita, naimacimmo llote:

37 —Jusiñamuimona bie urue jamai bue isoide. Abina iedoñede. Bie isoidimie cuemmo duillamona, naimiena feiñotimiedi cuena jai feiñote. Cuena

feĩñoitimie Jusiñamuina jiaĩ jai feĩnote, Jusiñamui cuena oretaja jira.

Jesúdi ie dibeimo itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaiñeite.

⁴⁰ Cai dibeimo itimiedi cai facaisena ite.

⁴¹ Ero, cuemo omoi duillamona, omoina bu janore canoia, Jusiñamuimona ibana feĩñoite. Omoimo nibai jamai jinuina fecaite; iadedi omoina naimie canuamona, Jusiñamuimona ibana feĩñoite. Ie jira naimie isoidino siño rafuena finuana rairuiñeno.

Jesúdi jeacinona finoñenana llofuia rafue

(Mt 18.6-9; Lc 17.1-2)

⁴² Jesús nia llofue:

—Cuena como ñnotinona jeacinona finotaiacadimie iena finoñellena, naimie cimaimo aillue nofici maianona, joraimo corobaillena naimiena dotacadena, mare.

⁴³⁻⁴⁸ Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena,

Jusiñamui ñine daje onolli ñiga, daje eilli ñiga, daje uisi ñiga riitomoi; ia jeacino omoi finoia, iraimo jaitomoi. Nana omoi abi ñiga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iramo omoi jaiñellena, jeacino finoño. Naimacimo ite aiaí fioldaiñena jira, naie irai jaca ñuiñenamona, nainomo itino jaca duere sefuitimaci.

⁴⁹ 'Ero, birui omoi duere sefuillamona, cue cominina jai jaidinona uiñoiticue.

⁵⁰ Guille caimaretallena, sal mare; iadedi ie caimano jai iñenia, iena dane caimaretañedicaí. Ie isoide. Jeacino omoi finoia, omoi comeciaí caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

*Jesús ima ie aina dotaja rafuena llofuia rafue
(Mt 19.1-12; Lc 16.18)*

¹ Capernaumona ie llofueoicaigano ñiga, Jesús oni jaillanona, Judea railla enirue ñine jaide. Jordán railla ille ruica ñibeimo jaide. Ailluena comini naimie ñine ofillamona, naimie llofueuilla isoi, naimacina llofue.

² Naimiena facacillena, dajerie fariseuai naimie ñine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³ Uai ote:

—¿Ñiese Moisés micori llote?

⁴ Uai otimaci:

—Moisés micori jaie cuete: “fima ie aina dotaacania, dotalle rabena nano cueite. Ie mei naiñaiñona dotaite”.

⁵ Jesús uai ote:

—Jusiñamui uaina raise omoi ñnoñena jira, Moisés micori ñima ie aina dotajana rairuiñede;

⁶ iadedi nano dofoconi iese iñede. Enirue finua facaiseconi Jusiñamuidi come iaïmaiaïna finode. ñimana finode. Riñona jiai finode.

⁷ Ie jira Jusiñamuidi jaie llote: “Ie ai diga illena, ñima ie moona fañonocaite. Ie eina jiai fañonocaite. Ie ai diga illamona, menade comedi daamiëna jai jaide” llote.

⁸ Menade come jai daamiëna jai ite.

⁹ Jusiñamui iese iaïmaiaïna itataja jira, ñima ie aina dotajana rairuidicue. Riño ie ñina dotajana rairuidicue.

¹⁰ Jofomo ie llofueoicaigano diga, naimie nailli illanona, naimiemo bie rafuena jicanotimaci.

¹¹ Jesús ñinena llote:

—Jiaie riño diga naimie illena, ie aina bu dotaia, naimiedi jecinona jai finode. Ie aina jeare jiai finode.

¹² Ie ñina fañonocaillanona, jiaimiëna ñie riño uamona, naiñaiño jecino jai finode.

*Jesúdi naimie ñine uruiaï billana jitailla rafue
(Mt 19.13-15; Lc 18.15-17)*

¹³ Naie facaise Jesús ñine comini naimaci jesanide ñiese atidimaci. Ie onolli naimacimo naimie joniana jitaïdimaci. “Naimacina raise cano” ie Momo lollena jitaïdimaci. Ie llofueoicaigano iena rairuidimaci;

¹⁴ iadedi iena cacajano, Jesús icirite. Jesús raite:

—Uruia: cue dine billesa. Naimacina rairuiño. Cuen bie isoi ñnotinodi Jusiñamui cominidimaci.

¹⁵ Bie uruia: abina ñedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

¹⁶ Naie uruia: dasarie meni-menioicaida, naimaci ifogimo ie onollina joneta:

—Jusiñamui omoina canoite —llote.

*Ucuberedimie Jesús diga ñaia rafue
(Mt 19.16-30; Lc 18.18-30)*

¹⁷ Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

¹⁸ Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano.

¹⁹ Moisés micori llogacinuaina ñnocana jai. Jaie cuete: “Comena meineño. O aiñede riño diga iño. Fiiño. Jaimiena o llogidoia, tainona lloño. O moo uaina ñno. O ei uaina ñno”.

²⁰ Uai ote:

—Maestro, uruena cue illa facaisemona nana bie llogacinuaina ñnoticue.

²¹ Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena

dueredinomo feca. Cueno o ñnuamona, monamo
ico jaca iitio. Cue llofuegamiena o illena, mai cue
diga bi.

²² Iena cacajano, naimiedi sunaite. Eo aillue ra
naimiemo illa jira, iena naimie fecacaiñena jira,
sure jaide.

²³ Naimie jailla mei, ie llofueoicaiganomo
eruaillanona, naimacimo llote:

—Ucuberedinodi Jusiñamui cominina jaillena eo
sefuiruitimaci.

²⁴ Iena cacajano, iena naimaci raise cacaiñena
jira, Jesús dane llote:

—Cue cominidomoi. Ero, ucuberedimiedi
Jusiñamui cominina jaillena eo sefuiruite.

²⁵ Igido ifodo camello jaca jainide. Ie isoide.
Ie ra isiruillamona, ucuberedimiedi Jusiñamui ie
cominina jiai raise jainide.

²⁶ Iena ie llofueoicaigano cacajano, Jusiñamui
cominina ucuberedino raise jainina jira, “¿Ñiese
dueredinodicaidi Jusiñamui cominina jaiticai?”
raillamo comeciaina facadimaci. Raijicaillanona,
coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruaillanona, Jesús raite:

—Nana comini dani jillobinidimaci; iadedi
Jusiñamuidi naimacina jillobitarede.

²⁸ Pedro dinena llote:

—O llua isoi jai finodicai. Nana cai rana
fainonocaida, o diga jai jaicabidicai.

²⁹ Jesús uai ote:

—Uanaicino lloiticue. Cueno naimie
isiruillamona, cue rafuena naimie lluamona,
ie jofona bu fainonocaia, ie amatiaina bu

fainonocaia, ie miriñuaína bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruenta bu fainonocaia,

³⁰ Jusiñamuimona birui ailluena ibana feiñoite. Duere sefuite; ia naimie isoi cue comina ailluena jaillamona, naimie jofue iite. Ie amatai, ie miriñuai, ie eitai, ie uruai, ie enirue birui iite. Monamo naimie ico caimare iocire jaca iite.

³¹ Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoiñedimaci; ia Jusiñamuimona ico jamai bue isoitimaci Jiaínomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoiñeitimaci.

*Jesús ie fiodaillena dane llua rafue
(Mt 20.17-19; Lc 18.31-34)*

³² Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano rajicaidimaci. Naimaci diga jaidino jaciruoicaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo sulle rafuena llote:

³³ —Ero, Jerusalémo jai jaidicai. Monamona bilanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. Judíuaiñedino illaicominimo cuena fecaitimaci.

³⁴ Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue — llote.

*Jesús dine Jacobo Juan ia:maia: billa rafue
(Mt 20.20-28)*

³⁵ Naie facaise Jesús dine Jacobo, Juan diga bitia:maia:. Iaimaia: moodi Zebedeo. Raitia:maia:.

—Omo coco jicalle rafue cocoena finuana jita:dicoco.

³⁶ Jesús uai ote:

—¿Nie isoide rafuena jita:domico?

³⁷ Uai otia:maia:.

—Illa:mana o jailla mei, o ecimo coco illena o llwana jita:dicoco. Damie o nabeimo. Jiaimie o jarifebeimo. —Jiaino afemo ia:maia: illena, iese llotia:maia:.

³⁸ Jesús dina:llote:

—Omico jicanuana raise uiñoñedomico. Cue eo duere sefuiticue. Llegi cacaiticue. ¿Ie isoi duere sefuiacadomico? ¿Ie isoi llegi cacaiacadomico?

³⁹ Uai otia:maia:.

—Jii. Sefuiacadomico.

Jesús dina:raite:

—Cue isoi duere sefuitomico. Llegi cacaitomico;

⁴⁰ iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

⁴¹ Iena jiaie llofueoicaigano cacajano, naie ia:maia:iri iciritimaci.

⁴² Jesús nana naimacina uaiduanona, raite:

—Nana illa:cominidi naimaci anamo itinona ocuicabidimaci;

⁴³ iadedi omoi dine iese iñena. Omo:mona bu imiena iacania, omoi mulla:mana naimie jaisoil-lasa.

⁴⁴ Omoimona bu imiēna iacania, omoīna naimie canocana jaisoillasa.

⁴⁵ Cuemona fueo. Biñedicue, cominina cue ocuillena; iadedi cominina canuaibidicue. Cue jitailla jira, nana comini facaina fioldaisaibiticue. Naimaci jeacinomona naimaci jillobillena, fioldaisaibiticue. Ailluena comini cuena inuamona, jilloitimaci. Coninina omoi canua —llote.

*Jesúdi Bartimeona jillotaja rafue
(Mt 20.29-34; Lc 18.35-43)*

⁴⁶ Oni jaillanona, Jericó railla nairaimo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fuemo uisimidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena.

⁴⁷ Nazaret ie Jesús jaillana naimie cacajano, ado cuirioide:

—David micori Jitona o illamona, Jusiñamuimona o billa jira, cuena duenai. Cuena cano.

⁴⁸ Naimie lliscaillena, Jesús diga jaidino naimiēna lletade; iadedi eo cuirioide:

—Maestro, David micori Jitona o illamona, cuena duenai.

⁴⁹ Naimiēna cacajano, Jesús naidadajanona, llote:

—Naimiēna cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

⁵⁰ Iena cacajano, ie emodomo itiroina duiñuanona, raire naidacaida, Jesús dine bite.

⁵¹ Naimiemo Jesús jicanote:

—¿Niese ona cue nibaiana jitaideo?

Uai ote:

—Maestro, cioacaducue.

⁵² Jesús dinena uai ote:

—Cuená o ñnua jira, jai jillodio. Mai jai. —Ieconí naimie jai ciode. Jesús diga jaidino diga naimie jiai jaide.

11

*Jesús illaima isoi Jerusalémo jailla rafue
(Mt 21.1-11; Lc 19.28-40; Jn 12.12-19)*

¹ Oni jaillanona, Jerusalémo iaieicaidimacimo, Betfagé railla nairaimo ie llofueoicaigano diga Jesús ride. Betania nainomo jiai ite. Olivos railla anedumo naga nairai iaímaiaí ite. Ie llofueoicaiganomona Jesús menamiena orede.

² Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati.

³ Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaitelote”.

⁴ Naimie llua isoi, jaidiaímaiaí. Naisomo jofo nasemo burritona baillanona, iena suiñodiaímaiaí.

⁵ Ie facaise nainomo itino jicanote:

—¿Bue ñellena burritona suiñodomico?

⁶ Jesús llua isoi uai otiaímaiaí. Ie muidona:

—Jee —raitimaci.

⁷ Burritona atidiaímaiaí. Ie emodomo naimie llofueoicaigano naimaci ñiroi jobianona, ie emodomo Jesús rainadate.

⁸ Naimiena iobitallena, illaïma isoi naimie jaillena, diga comini, imaci iniroi diga, naiso motomo jobedimaci. Jiaïno nai fuemona raforona uanona, naiso motomo jobedimaci.

⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! Jusiñamui mamecido bitimie eo mare.

¹⁰ Cai illaïma David micori ifomo caina sedallena, damie billemo birui ocuridicaï. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

*Jesús higuera railla riarana faidua rafue
(Mt 21.18-19)*

¹² Ie areruido Betaniamona Jerusalémo abido ie llofueoicaigano diga Jesús bia, aimetaite.

¹³ Arena higuera railla riarana cïuanona, iena jibuide. Como firuide; ia naie llisilladi ñede. Ie llisilla facaise nia ñede.

¹⁴ Ie jira naie riarana llote:

—Biemona jaca llisiñeite. —Ie llofueoicaigano naimie lluana cacadimaci.

Jesúdi Jusiñamui jofomona damieriena dotaja rafue

(Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaïna fecallena, naimiemo toïca llaudaïaïna fecallena, nainomo

comini jaisoidimaci. Naie cominina ibatajanona, ofomaiana, toica llaudaiai diga, damierie fecauidimaci. Iena Jesús cianona, naimaci mesaiana oni caicode. Ucugina fecauidino rairacuai jiai oni caicode.

¹⁶ Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide.

¹⁷ Naimacina llofujete:

—Ie facaina lloraima micori Jusiñamui llogacino jaie cuega: “Cue jofo ite, nainomo nana comini cuemo jillena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁸ Judíuai illaicomini naimie finoca rafuena fidianona, naimiena meinellena, coniniri siadotimaci. Ailluena comini naimie llofuiana ebiruillanona, rajicaidimaci. Ie jira judíuai illaicomini naimiena jaciruillamona, naimiena nia meinenidimaci.

¹⁹ Nairui navuida ie llofueoicaigano diga, Jerusalémona Jesús oni jaide.

Jesús faidoca riana duilla rafue

(Mt 21.20-22)

²⁰ Ie are ie llofueoicaigano diga, Jerusalén dine Jesús jaillanona, higuera railla riana duillana ciodimaci. Nana ie jainao diga duillana ciodimaci.

²¹ Jesús navui are lluana Pedro uibiñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina ñnocana jai.

²³ Uanaicinona omoimo lloiticue. Jusiñamui lluana raise bu ñnoia, naimie comeci igireñenia,

bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite.

²⁴ Nie isoide rafue Jusiñamuimo omoi jicajia, naimie iena finuana omoi #nuamona, iena naimie finoite.

²⁵ Jusiñamuimo o jiacania, jiaimie diga o rafue ia iena feita. Ie isoi cai Moo Jusiñamui omoi mo ite jeacino jiai feitaite;

²⁶ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illacomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona,

²⁸ jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁹ Jesús dinena uai ote:

—Omoimo daje rafuena nano jicanoitícue. Raise omoi fairioia, omoimo cue uaido cue finoca rafuena lloitícue.

³⁰ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluaña #noñedomoi?”

³² “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

³³ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

12

*Jesúdi marañede maijiraini rafuena llua rafue
(Mt 21.33-46; Lc 20.9-19)*

¹ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiaruido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jianomo fecade. Ie mei jiaie eniruemo jaide.

² Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riara llisilla ollena;

³ iadedi naie sedarainidi ie mullaimana fatimaci. Ie mei naimiemo riara fecaño naimiena abido oredimaci.

⁴ Ie mei patrón jiaie mullaimana orede. Naimie ifogina bofedimaci. Naimiena jeare finodimaci.

⁵ Ie mei patrón jaimiena orede. Naimiena meinetimaci. Ie mei ailluena mullaiana orede. Damieriena fatimaci. Damieriena meinetimaci.

⁶ Patrómo ie isiruiga jito ite. “Cue jítona jaciruitimaci. Naimie uaina ñnoitimaci. Naimiena oretaiticue” patrón comecina facade.

7 Riaraiaina sedaraini naimiena ciuanona, coniniri raitimaci: “Bimemo bie illi fiebiite, naimie moo fiodailla mei. Naimiena cai meinelli, bie illi cai mo fiebillesa” raitimaci.

8 Naimaci dine naimie rilla mei, naimiena meinetimaci. Ie mei ie abina illimona jino dotadimaci.

9 Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Ie mei jianona ie illina sedataite.

10-11 Naimacimo Jesús lloite:

—Naie illi sedaraini isoidomoi. Jusiñamui facaina lloraima micori omoina jaie cuete. Ie cueba-fuena raise facañedomoi. Naimie micori cueba:

Jofo finoraini jitaiñena noficidi nana naie jofomo ite nofici baifemo jai uaide.

Jusiñamui iena finotate.

Iena cai uñuamona: “Eo mare” raiticai cueba. Jusiñamui cominina damerie jaillana naimie micori cuete. Jusiñamui oretagamiena damerie jitaiñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

12 Judíuai illaicomini iena cacajanona, Jesús naimacina ñaiana naimaci uñuamona, naimiena gaitaacadimaci; ia cominina jaciruitimaci. Ie jira naimiemoni onijaidimaci.

Jesúmo gobiernomo ucubena fecajana jìcanua rafue

(Mt 22.15-22; Lc 20.20-26)

¹³ Judíuái illaicomini jailla mei, dajerie fariseuai cominina Jesús dine oredimaci. Illaíma Herodes díbeimo itinona oredimaci. Naimie raise uai oñenia, naimiena duere finollena, Jesúna facaciacadimaci.

¹⁴⁻¹⁵ Naimiemo llotimaci:

—Maestro, uanaicinona llofuecabitío. Jusiñamui rafuedo cai marena jaillana raise llofuetío. Nana comini dauaido llofuetío. Cominina iobitallena llofueñedio. Omo rafuena jìcanoiacadicaí. Dani Jusiñamuina sedadicaí; iadedi romanuai railla nairai anamo birui cai illa jira, ¿naimaci illaíma Césarmo ucubena cai fecajana rairuidío? Caimo llono —llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoí? Ucube cuemo acata.

¹⁶ Ie jira acatatimaci. Naimacimo jìcanote:

—¿Bu ie joreño nainomo ite? ¿Bumo jainaiáide bie cuega radi?

Uai otimaci:

—César.

¹⁷ Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaana cacajano, naimie raise uai ua jira, ieri rajicaidimaci. Naimie iese llua jira, naimiena duere finonidimaci.

Jesús dine saduceuai railla comini billa rafue

(Mt 22.23-33; Lc 20.27-40)

18 Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

19 —Maestro, cai facaina Moisés micori jaie cuega: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

20 Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiainide fiodailla.

21 Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide.

22 Uruiainide nana fiodailla. Ja muidomo naie riño jiaí fiodaite.

23 Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

24 Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

25 Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi naie siete amatiaí iitimaci.

26 Fiodaitino ico jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

27 Jai fiodaitimaci; ia naimaci joreñuai nia itimaci. Jusiñamuidi dani cajedino imaci

Jusiñamuina jira, naimaci joreñuai naimie dine itimaci. Ico naimaci abiaina jia jillotaite. Fiodaillamona jilluana omoi raise uiñoñedomoi –llote.

*Jesús nanoca llogacinona llofuia rafue
(Mt 22.34-40)*

²⁸ Naie facaise Moisés micori llogacinona llofueraima Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

–Moisés micori jaie llogacinuaimona, ¿nie llogacino ua nanoca llogacinona?

²⁹ Jesús dinena uai ote:

–Moisés micori jaie cuela: “Israel comini, bie rafuemo cacarei. Cai Nama Jusiñamui jaca dajede.

³⁰ Omoi jitailla jira, nana omoi comeciai diga, cai Nama Jusiñamuina isirui. Naimiemo omoi comeciaina eo faca”.

³¹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jia isirui”. Bie mena llogacino jiaie llogacinuai baifemo faite.

³² Naie llofueraima dinena uai ote:

–Maestro, raise llotio. Jusiñamui jaca dajede. Jiaimie cai sedallena iñede.

³³ Cai jitailla jira, nana cai comeciai diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadica. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o ñnocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

*Jesús dinena fariseuai cominimo jicanua rafue
(Mt 22.41-46; Lc 20.41-44)*

³⁵ Jusiñamui jofomo Jesús jailla mei, nainomo itinomo jicanote:

—¿Ñiese Moisés micori llogacinona llofueraini Cristona raitimaci? ¿Ñiese naimiedi David micori jitona raitimaci?

³⁶ Jusiñamui Joreñodi David micorina ñaitatajanona, David micori llote: Jusiñamuidi cue Namamo llote: “Illaïmana o illamona, cue nabei ñine ana rai.

Ona ñinoñedino o anamo itataiticue”.

³⁷ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama. —Nainomo itino naimie llofuiana iocire cacareidimaci.

*Jesúdi judíuai illaicomínina ñaia rafue
(Mt 23.1-36; Lc 11.37-54; 20.45-47)*

³⁸ Jusiñamui jofomo Jesús nia llofuianona, raite:

—Moisés micori llogacinona llofuerainimona abina rairui. Illaicomínina naimaci itimaciden, naimacina comini cioillena, eo mare iniroina jitaacacabidimaci. Ñine naimaci macaria, naimaci jamai bue isoñedínona itimaciden, comini naimacina uaiduana gaidimaci.

³⁹ Comini naimacimo acarillena, ofiracomo uicomo raiacadimaci. Rafue ia: “Jamai bue isoñedícaï” raillamo comequina facajanona, rafue nama ecimo raiacadimaci.

40 Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

41 Jusiñamui jofomo Jesús nia ia, ucube fecarano uicomo ana raide. Nainomo comini ucubena jonio eruaide. Ailluena ucuberedino ailluena ucubena jonetimaci.

42 Ie facaise eo duerede feciño menaruñu jonete.

43 Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete.

44 Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaino baifemo jonete.

13

Jesúdi Jerusalémo ite Jusiñamui jofu judaiana llua rafue

(Mt 24.1-2; Lc 21.5-6)

1 Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúsno damie raite:

—Maestro, bie jofomo ite noficiái co ebirede. Bico eo ebire ciode.

2 Jesús dinena uai ote:

—Bie jofo birui eo mare; ia nana bie jofomo ite noficiai iico judaisite —llote.

³ Ie mei Olivos railla anedu dñe rillanona, Jusiñamui jofo uico dñe Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴ —Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵ Uai ote:

—Omoina bie rafuena bu jifueñellena, omoí abina rairui.

⁶ Ailluena comini cue mamecido billemona: “Cristodicue” raitimaci. Diga comina jifueitimaci. Iemona omoí abina rairui.

⁷ Jobaimiaí illena fidiitomoí; iadedi jaciruiñeno. Iese suite; iadedi abido nia biñeiticue.

⁸ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime guitimaci. Iese suia, omoí duere sefuillifue omoimo suite.

⁹ Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci. Cuemo omoí duilla jira, omoina gaitajanona, omoina duere finollena, illaicomini dñe omoina uitimaci; ia naimacimo cue rafuena lloitomoí.

¹⁰ Diga comini cue rafuena nana nairaimo lloitimaci, nana nairaiái iena cacaillena. Ie mei abido biiticue.

11 Naie illaicomini dine omoi ia, juez dine omoi ia, omoi abi riddollicinomo omoi comeciaina jarire facañeno. Naie facaise omoi ñaillicinona uiñoitomoi. Dani omoi comeciái icinodo ñaiñeitomoi; ia Jusiñamui Joreño uaido ñaitomoi.

12 Cuená ñnotomoi; ia ailluena cuena ñnoñeitimaci. Cuená omoi ñnua jira, omoína enoitimaci. Iemona dajerie ie amana meinetallena, naimiēna llogidoite. Dajerie moodi ie uruena meinetallena, naimiēna llogidoite. Dajerie uruiaidi naimaci moona, naimaci eina meinetallena, naimacina llogidoitimaci.

13 Cue cominina omoi illamona, nana nairai omoína enoitimaci; iadedi cuena fañonocaiñēdimie ja muidomo monamo jaca iite. Naimiēna jillotaiticue.

14 Cue lluomo cacarei. Jusiñamui facaina lloraimadi jiaimie jearede rafue finollena jaie llote. Naie rafue sua, Jusiñamui jofomo Jusiñamuina sedañeitomoi. Nainomo ite jearede rafue finuana omoi cūanona, naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi.

15 Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno.

16 Aneduai dine raire rillena, illimo omoi ia, abido jofomo biñeno, omoi iniroi omoi diga uil-lena.

17 Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite.

18 Eo duere sefuiñellena, Jusiñamuimo omoi

jicano, rollime facaiseconi bie rafue suiñellena.

¹⁹ Naie facaise comini eo duere sefuitimaci. Jusiñamuidi enirue finua facaise mona iese comini nia duere sefuiñedimaci. Ico iese eo duere sefuiñeitimaci.

²⁰ Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹ 'Te facaise omoimo bu raia: "Jadi, Jusiñamui facaina lloraima benomo birui bairede. Naimiedi Cristo", iena ñnoñeno, Jiaimie raia: "Oni batine Cristo birui bairede", iena ñnoñeno.

²² Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

²³ Ie jira omoi abina rairui. Ero, bie rafue nia suiñenia, iena omoimo jai lloticue.

Jesús abido ie bille rafue

(Mt 24.29-35, 42-44; Lc 21.25-36)

²⁴ Naie duere sefuilla facaise meinocni, jitoma lligaiñoñeite. Fivui jiai lligaiñoñeite.

²⁵ Monamona ucuai ana llujite. Nana naie radi jaidisite.

²⁶ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

²⁷ Cue jaienisaína cue ecimona oretaiticue. Cue fetocano diese naganomona ofitaitimaci.

²⁸ 'Higuera railla riaramona omoi fueo. Bie eniruemo naie riara firuillamona, fiemona raire illana uiñotomoi.

²⁹ Ie isoide. Bie rafue ico suia, cue billirui iairei illena uiñoitomoi.

³⁰ Uanaicinona omoimo lloiticue. Nana bie rafue suille facaiseconi bie nairai nia iite.

³¹ Mona enirue diga fuite; iadedi cue lloga uai jaca suite.

³² Cue abido billirui jaca bu uiñoñede. Jusiñamui jaienisaí iena uiñoñedimaci. Jusiñamui Jitodicue; iadedi cue abido billiruina jiaí uiñoñedicue. Dama cue Moo iena uiñote.

³³ Abina rairuicana jai. Naimie omoína canolena, Jusiñamuimo jiaí jicabi. Cue billirui omoí uiñoñena jira, iemo ocuiri.

³⁴ 'Iena omoí raise uiñollena, bie rafuena lloiticue. Patrón jiaíe eniruemo jaide. Nia jaiñenia, ie mullaiaína ie jofona sedatate. Nagamie ie majille ocuide. Jofo nasena sedadimie mo naimie billemo raise ocuirillena llote.

³⁵ Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite.

³⁶ Ebena naimie biite. Inidimacimo naimaci baisaibi raillanona, naimaci jaca ocuirilla.

³⁷ Ie isoide. Ebena biiticue. Cue abido billirui omoí uiñoñena jira, iemo jaca omoí ocuiri.

14

Judíuai illaicomini Jesúna gaitallena, siadua rafue

(Mt 26.1-5; Lc 22.1, 2; Jn 11.45-53)

¹ Naie facaise pascua railla rafue illena, menarui fiebide. Naie facaise llomenico guille rafue jiaí ite. Naie rafue ia, siritaga rana jaca guiñedimaci. Egiptomona naimaci jaiagai jillobillana começillena, naie rafue ite. Judíuai

illaicomini Jesúsna jifuiano gaitaacadimaci. Naimiena meineiacadimaci. Iena siadua mei,

² raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuitimaci. Nia sedaiticai.

*Jesúmo riño caimare soride ra totaja rafue
(Mt 26.6-13; Jn 12.1-8)*

³ Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

⁴ Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide.

⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

⁶ Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiñona jeare ñaitomoi? Mare rafuena cuemo finode.

⁷ Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue.

⁸ Cue facaina naiñaiño finoacana diese jai finode. Nia fiodañedicue; ia cue fiodaillirui facaina naiñaiño iese finode.

⁹ Omoimo uanaicinona lloiticue. Ninomo cue mare finoca rafuena bu lloia, naiñaiñona

uibiñollena, nana cominimo naiñaiño finoca rafuena lloite.

Judas micori raillamie Jesúsna gaitataiacana rafue

(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúsna gaitatallena, Jusñamui diga nanoca ñairaini dine jaide.

¹¹ Iena cacajano, iobidimaci.

—Iena o finoia, omo ucubena fecaiticai — llotimaci. Iemona Jesúsna gaitatalliruimo Judas ocuride.

Jesúdi ie fiodaille rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llaudaiaina fajarui illanona, Jesúsno ie llofueoicaigano jicanote:

—¿Ninomo pascua railla rafue ie guille finuana jitaideo?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca.

¹⁴ Naimie jailla jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ”

¹⁵ Ie mei omicomo afebebamo ite aillue cuar-tona acataite. Na raruiaí diga ite. Nainomo cai guille fino.

¹⁶ Jesús llua isoi jaidiaimaiaí. Jerusalémo rilla mei, naimie llua isoi baitiaimaiaí. Pascua rafue guille finodiaimaiaí.

17 Nairui jitoma ana itemo, ie llofueoicaigano diga, Jesús nainomo guisaide.

18 Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

19 Iena cacajanona, sunaitimaci. Damierie naimiemo jicanoside:

—¿Cuena ñaitio?

20 Uai ote:

—Omoimona damie bie platomo cue diga llomenico diga mutade.

21 Jusiñamui facaina lloraíma micorí cuega isoi, monamona jai billamona, fiódaitícue; iadedí cuena gaitaitimie eo duere sefuite. Naimie jeiciñegadena, cuemona mare.

22 Naimaci nia guitimacimo, llomeniconona Jesús llinuanona, Jusiñamuimo iobillacínona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodí cue abí facai ie. Cue abímo omoí comecina facajano, iena guiño.

23 Ie mei naimie jiroracona jiai llinote. Jusiñamuimo iobillacínona llua mei, naie jiroracomo jai totaca vino naimacimo fecade. Iemona nana jirodimaci.

24 Naimie raite:

—Cue fiódailamona, dama cue diaillamona, jeacino anamona ailluena jillotaitícue. Jusiñamui jiaie rafue birui itatajamona, naimaci jeacino oni dotajana jai llote. Bie vinodí naie rafue facai ie.

25 Omoína bene dane iese caimare nabaiñeítícue. Cue Moo sedajanomo omoí diga

cue ia, nainomo omoına dane iese caimare marena nabaiticue.

*Jesúdi Pedro naimiēna januana llua rafue
(Mt 26.30-35; Lc 22.31-34; Jn 13.36-38)*

²⁶ Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide.

²⁷ Naimacimo llote:

—Cuenta fañonocaitomoi. Jusiñamui facaina lloraima micori iena jaie cueba: “Toica llaudaiai sedaraimana meinetimaci. Naimie toinia uaficaida jaitimaci” cueba. Naimie micori caina cuete.

²⁸ Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

²⁹ Pedro uai ote:

—Nana jiaino ona fañonocaia, ona jaca fañonocaiñeiticue.

³⁰ Jesús dinena raite:

—Uanai omo lloiticue. Ja naio itava menacaiño nia ñaiñenia, dacaiño amani cuenta janoitio.

³¹ Pedro dinena riire llote:

—O diga cue fiodaialedi, ona janoñeiticue.

Nana ie llofueoicaigano daje uaido jia raitimaci.

*Jesúdi Getsemanímo Jusiñamuimo jia rafue
(Mt 26.36-46; Lc 22.39-46)*

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri ñede.

34 Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

35 Naimie janore bai jaillanona, eniruemo bitadate. Naimie duere sefuiñellena, Jusiñamuimo jide:

36 —Ore Moo, nana rana finoredio. Cuenallegi cacaitaño. Cue jitailla isoi cuena finoño; iadedi o jitailla isoi cuena fino.

37 Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo.

38 Iniñeno. Taife ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñotallena —llote.

39 Ie mei dane jillena jaide. Ailli naimie jia isoi, dane jide.

40 Ie llofueoicaigano dine dane billanona, naimaci uisi llirioilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede.

41 Dane jia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodaille facaise jai ite. Jusiñamui jitailla jira, cuena ja gaitajanona, naimiena inoñedino anamo ja iiticue.

42 A naidacai. Maiña. Cue gaitataitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micorillogacinona llofuerainimona bitimaci. Naimaci einamacimona bitimaci.

⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵ Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote.

⁴⁶ Ie jira Jesúna gaitadimaci.

⁴⁷ Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaíma jefona jaíbonote.

⁴⁸ Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuená gaitallena, firiraimadicueta cuemo omoi billa.

⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuená jai omoi gaitajamona, Jusiñamui facaina lloraini micoriai ciegafuiai suite.

⁵⁰ Ie facaise nana naimie llofueoicaigano naimiena fañonocaillano, aisidimaci.

Jesús jinafona conirue racaja rafue

51 Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci;

52 ia ie iniroina fainonocaillanona, taimiena aiside.

Jesúdi judúuai illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

53 Jesúna gaitaja mei, Jusiñamui diga nanoca ñairaima dine naimiena uitimaci. Nana judúuai illaicomini itimaci. Nanoca ñairaini itimaci. Einamaci jiai itimaci. Moisés micori llogacinona llofueraini jiai itimaci.

54 Pedro naimaci jinafona aarena racade. Jusiñamui diga nanoca ñairaima nairaibirimo jaide. Jofono sedadino diga nainomo ite iraimo agaide.

55 Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci.

56 Diga comini Jesúna llogidotimaci; ia tainona llotimaci. Daje isoi lloñedimaci.

57 Damierie billanona, tainona llogiduanona, raite:

58 —Bimie llwana cacadicaí. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaíanona, darui amani illanona, jiaie finoiticue. Comini iena finoñeitimaci”.

59 —Iese llotimaci; ia daje isoi lloñedimaci.

60 Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

⁶¹ Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

⁶² Jesús uai ote:

—Jii, naimiedicue. Monamona jaie cue billamona, imana jaidicue; ia ico jairuido illaimana cue illena, Jusiñamui ecimo cue raillena, omoi nairai cioitimaci. Mona uillimo cue abido billena jiai cioitimaci.

⁶³ Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitaiñedicaí.

⁶⁴ Jusiñamuina naimie jeare ñaiana jai cacadomoi. ¿Niese naimiena raitomoi?

Jiaie illaicomini dinena:

—Naimie fiodaillesa —llotimaci.

⁶⁵ Ie facaise damerie naimiena tuallaitimaci. Ie uiecona ibaila mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoidimaci.

Pedroí Jesúna janua rafue

(Mt 26.69-75; Lc 22.56-62; Jn 18.15-18, 25-29)

⁶⁶ Naie facaise Pedro nairaibirimo ite. Naie nanoca ñairaima mullañuaímona dañaiño nainomo billanona,

⁶⁷ Pedro agaillana cide. Raite:

—Nazaret ie Jesús cominidio.

⁶⁸ Pedro iena januano, raite:

—O llwana uiñoñedicue. Iena raise cacaiñedicue.

Ie mei nase fueo jaide. Naie facaise iitava dacaiño ñaite.

⁶⁹ Naie mullaíño naimiena dane ciuanona, nainomo jamai itinomo llote:

—Bimiedi Jesús ie llofueoicaigano imie.

⁷⁰ Iena Pedro dane janote. Dallu illanona, nainomo jamai itino Pedromo llote:

—Odi Galilea imiedo. Jesús diga jaicabidio.

⁷¹ Uai ote:

—Uanai cue lloñenia, Jusiñamui cuena duere finoite. Uanaicinona cue llwana naimie uiñote. Ero, omoi llogamiena uiñoñedicue.

⁷² Ieconi iitava dane ñaite. Iena cacajano, Pedro Jesús llwana uibiñote. Jaive naio Jesús Pedromo llote: “Iitava menacaiño nia ñaíñenia, dacaiño amani cuena janoitio”. Iena uibiñuamona, Pedro eo eede.

15

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

¹ Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

² Pilato naimiemo jicanote:

—¿Judíuai comini illaimadio?

Jesús uai ote:

—Jii.

³ Ie muidona Jusiñamui diga nanoca ñairaini Jesúna llogidotimaci:

—Naimie diga marañede rafuena finode — llotimaci.

⁴ Pilato dinena naimiemo jicanote:

—¿Niese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodi Jesús fodaillana llua rafue

(Mt 27.15-31; Lc 23.13-25; Jn 18.38-19.16)

⁶ Naga año pascua railla rafue facaiseconi cárcelmo itinomona Pilatodi comini jicacamiena jamai jino orede.

⁷ Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite.

⁸ Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci.

⁹ Pilato jicanote:

—¿Bu jino cue oretallena jitaidomoi? Omoi judíuai railla illaimana nibai jitaidomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meiniacanana jiaí uiñote.

¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci.

¹² Iena cacajano, Pilato naimacimo jicanote:

—¿Niese bimiena cue finuana jitaidomoi? Naimiedi omoi judíuai illaima raillamie.

¹³ Ado llotimaci:

—¡Naimiena corai!

¹⁴ Pilato dane jicanote:

—¿Nie isoide maraiñede rafuena finode? —Iena cacajano, ado ibi llonoidimaci:

—¡Naimiena corai!

15 Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiena coraillena orede.

16 Soldaduai naimiena gobernador jofo fo uillanona, nana soldaduai nainomo ofidimaci.

17 Jiduirede iniroi naimiemo jítadimaci. Ecuaimona niga nuiciraina naimie ifogimo jítadimaci.

18 Naimiena jifanoduanona, naimiena uaidotimaci:

—¡Jadi, judíuai illaíma!

19 Radosi diga ie ifogimo buta-butadimaci. Naimiena tuallaítimaci. Naimie illaímana itena, naimiena sedallena, caiñici ifodo raiedimaci.

20 Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiena coraillena oni uitimaci.

Jesúna coraía rafue

(Mt 27.32-44; Lc 23.26-43; Jn 19.17-27)

21 Jerusalémona naimaci jaillanona, jamai bitimiemo dafaífidimaci. Naimiedi Simón. Cirene railla enirue imie. Naimie jito iaímaiaídi Alejandro iaímaiaí Rufo diga. Jerusalén onifemona naimie billanona, naimiemo dafaífidimaci. Naimiena Jesús uiga cruzna rocatatimaci.

22 Gólgota raillanomo jaidimaci. Ifocoraina eruailla jira, iese mamecírede.

23 Nainomo rillanona, ie abi isirena cacaiñellena, vinomo erirede rana faianona, Jesúmo fecadimaci; iadedi naimie iena jiroñede.

24 Ie mei naimie cruzmo coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uinollena, jifanododimaci.

25 Jitoma nia furi daidemo, naimiena coraidimaci.

26 Cruzmo ie llogiduafuena jonetimaci. Jai cuega: “Judíuai comini Illaíma”.

27 Ie mei mena firiruide iaímaiaína coraidimaci. Damie Jesús nabeimo coraica. Jiaimie Jesús jarifebeimo coraica.

28 Iemona Jusiñamui facaina lloráima micori jaie cuegafue suide. Cuega: “Maraiñedino isoi naimie jai ite”.

29 Naisodo jamai jaidino Jesúna mameritimaci. Mamerillamona, ifogiaína jaididimaci. Raitimaci:

—Navui raisoidio: “Jusiñamui jofona judaiticue. Darui amani illanona, iena dane finoiticue” raisoidio.

30 Ie muidona dama o abina mai jillota. Cruzmona ana bi.

31 Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiaí jifanododimaci. Raitimaci:

—Jiaie cominina jillotate; ia dama naimie abina jillotanide.

32 Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iena cai cioia, naimiena inoíticai. —Iese naimiena jifanododimaci. Naimie

diga coraicamie iaïmaiaï naimiena jiaï jeare ñaitiaïmaiaï.

Jesús fiodailla rafue

(Mt 27.45-56; Lc 23.44-49; Jn 19.28-30)

³³ Jitoma naidai itemona, daje amani horas mona jitibicaide.

³⁴ Ie meinomo judúuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

³⁵ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraïma Elíana uaidote —raitimaci.

³⁶ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. Raite:

—Dallu sedaiticai. Elías naimiena jillotajaibillena uiñoiacadicaï.

³⁷ Ie facaise ado cuirioita fiodaite.

³⁸ Naie facaise Jusiñamui jofomo ie fetaca ñiroife ana anaba jillacimo metodo menafe cuararide.

³⁹ Jesúna sedallena, nainomo capitán ite. Jesúmo eruaïllanona, Jesús fiodaïllana ciode. Raite:

—Uanai bimiedi Jusiñamui Jito.

⁴⁰ Dajerie riñoniaï naie rafuena aarena cioidimaci. Naimaci motomo María Magdalena ite. Jiaie María jiaï ite. Naiñaiñodi Jacobo ei. Naimiedi jamamie. Naiñaiñodi jiaï José ei. Salomé jiaï ite.

⁴¹ Galileamo Jesús navui illa facaise naie riñoniai naimie diga jaisoidimaci. Naimiena canouidimaci. Jerusalémo Jesús billanona, ailluena riñoniai naimie diga jiai bitimaci. Ie fiodaillana jiai cioidimaci.

Jesús raiafomo jonia rafue

(Mt 27.57-61; Lc 23.50-56; Jn 19.38-42)

⁴² Jitoma ana itemo, sábado rille jai iairei illanona,

⁴³ Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajonomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade.

⁴⁴ Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

⁴⁵ –Jesús jai fiodaite –capitán railla mei, Pilato Jesús abina Josémo fecallena llote.

⁴⁶ José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade.

⁴⁷ María Magdalena, jiaie María diga, naimie raiana ciode. María José ei.

16

Jesús fiodaillamona jillua rafue

(Mt 28.1-10; Lc 24.1-12; Jn 20.1-10)

¹ Sábadoruimo jitoma sojicaidemo, María Magdalena caimare soride rana ibade. Jacobo ei,

María jiai ibade. Salomé jiai ibade. Jesús abimo jonellena, ie abina raise finollena naimaci einamací finocabilla isoi, naiñaiñuai iena ibade.

² Domingo jítiramo jítoma como bairedemo, Jesús raiafo dine naiñaiñuai jaide.

³ Jaillanona, coniuaimo jicante:

—¿Bu noficina caina oni ñuitalle raiafomona?

⁴ Raiafo dine rillanona, iemo eruailanona, nofici oni ñuitacana cide. Naie nofici eo aillue.

⁵ Raiafomo jaillanona, naiñaiñuai coniruena eruaidimiena nabeimo raillana cide. Naimie are userede iniroina jítade. Naimiedi Jusiñamui jaienici. Naiñaiñuai jacinante.

⁶ Nainomo itimie dinena raite:

—Jacinañeno. Nazaret ie Jesúsna jenodomoí. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda.

⁷ Naimie llofueoicaiganomo iena lluai. Ua Pedromo llono. Galileamo omoí uicomo naimie jaite. Omoímo naimie llua isoi, naimiena cioitomoí.

⁸ Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bumo lloñede.

*Jesús María Magdalenamo bairia rafue
(Jn 20.11-18)*

⁹ Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede.

¹⁰ Naiñaiñomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

11 –Naimie jai jillode. Naimiena jai ciodicue – naimacimo naiñaiaño llua mei, iena ñnoñedimaci.

*Mena llofueoicaiganomo Jesús bairia rafue
(Lc 24.13-35)*

12 Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iaimaiaia naisomo macaria, iaïmaiaïmo bairede.

13 Jerusalémo abido iaïmaiaia rilla mei, jiaïe llofueoicaiganomo iena llotiaïmaiaia; ia ñnoñedimaci.

*Jesús ie once llofueoicaiganomo bairia rafue
(Mt 28.16-20; Lc 24.36-49; Jn 20.19-23)*

14 Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote.

15 Naimacimo llote:

–Nana nairaiaïmo jai. Nana cominimo cue mare rafue llocana jai.

16 Cuen a ñnuamona, bautizagano diese Jusiañamuimona duere sefuiñeitimaci; iadedi Jusiañamui cuena ñnoñedinona duere finoite.

17 Cuen a ñnotino Janaba anamo itinomona Janabana oni oretaitimaci. Naimaci nia uiañoñega uaido ñaitimaci.

18 Jaiona naimaci llinoa, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

*Jesús monamo jailla rafue
(Lc 24.50-53)*

19 Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide.

20 Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cueba rafue jai fuite. Marcodicue.

**Jusiñamui uai: Jusiñamui jito rafue illa
rabenico**

**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488